

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKOG KANTONA
KANTONALNO TUŽILAŠTVO-TUŽITELJSTVO
ZENIČKO-DOBOJSKOG KANTONA
Z E N I C A**

PRITVOR!

**Broj: T04 0 KT 0056632 24
Zenica, 29.03.2024. godine**

OPĆINSKOM SUDU U ZENICI
-Sudiji za prethodno saslušanje-

Na osnovu člana 45. stav 2. tačka i) u vezi sa članom 241. stav 1., člana 242. stav 1. Zakona o krivičnom postupku F BiH, p o d i ž e m

OPTUŽNICU

Protiv,

D. A., osuđivan presudom Općinskog suda u Zenici od 02.09.2020. godine za krivično djelo iz člana 287. stav 1. tačka a) u vezi sa članom 31. i 55. KZ F BiH, na kaznu zatvora u trajanju od devet (9) mjeseci, uslovno dvije (2) godine, presudom Općinskog suda u Zenici od 24.11.2020. godine za krivično djelo iz člana 287. stav 3. u vezi sa članom 31. KZ F BiH, na kaznu zatvora u trajanju od četiri (4) mjeseca, uslovno dvije (2) godine, presudom Općinskog suda u Zenici od 29.04.2021. godine za krivično djelo iz člana 287. stav 1. tačka a) u vezi sa članom 31. i 55. KZ F BiH, na kaznu zatvora u trajanju od devet (9) mjeseci, presudom Općinskog suda u Zenici od 30.11.2020. godine za krivično djelo iz člana 287. stav 3. tačka a) u vezi sa članom 31. i 55. KZ F BiH, na kaznu zatvora u trajanju od osam (8) mjeseci, uslovno tri (3) godine, **nalazi se u pritvoru po Rješenju Općinskog suda u Zenici od 07.01.2024. godine, a koji pritvor mu je produžen Rješenjem Općinskog suda u Zenici od 05.02.2024. godine i koji pritvor se ima računati od 05.02.2024. godine od 12,08 sati i može trajati najduže do 05.04.2024. godine do 12,08 sati,**

što je,

1. dana 05.01.2024. godine, oko 16,00 sati na području grada Zenica upravljajući pmv VW „Polo“ reg. oznaka ..., krećući se ulicom Saliha Skomorca iz smjera Strnokosa prema Gradištu brzinom od 63,20 km/h koja je za 13,20 km/h veća od dozvoljene brzine kretanja, svjestan da na taj način može ugroziti javni promet i tako dovesti u opasnost živote i tijela drugih učesnika u saobraćaju, ali je olako držao da se to neće desiti, pa postupajući suprotno odredbama člana 44. stav 1. Zakona o osnovama bezbjednosti saobraćaja na putevima BiH, vozeći tako u mjestu Gradište kod broja 64. navedene ulice izgubio kontrolu upravljanja nad vozilom, a potom prešao sa istim na lijevu stranu kolovoza kada je prednjom stranom svog vozila udario u metalnu ogradu pored puta koja se usljed udara srušila na pješake S. Z., D. E. i S. E., koji su iza nje stajali, ugrozivši na taj način sigurnost javnog prometa usljed kojeg udara su S. Z. i D. E. zadobili teške tjelesne povrede i to S. Z. teške tjelesne povrede u vidu oguljotine kože lijevog lakta, prelom gornjeg dijela (zglone plohe) lijeve golenjače i prelom srednjeg dijela lijeve lisne kosti, D. E. teške tjelesne povrede u vidu razdernonagnečne rane lica u dijelu obraza desno i odvajanje kože i potkožnog tkiva lijevog stopala, dok je S. E. zadobio laku tjelesnu povredu u vidu krvnog podliva kože unutrašnje strane desne potkoljenice,

2. dana 05.01.2024. godine u Zenici, u kući koja se nalazi u ulici, suprotno odredbama člana 4. stav 1., 2, 3. i 5., a u vezi sa članom 19. i 20. Zakona o sprečavanju i suzbijanju zloupotrebe opojnih droga BiH, iako je bio svjestan da je držanje opojne droge radi prodaje zakonom zabranjeno, to je i htio, pa je neovlašteno radi prodaje držao jedan paketić sačinjen od najlonske folije sa sadržajem nepoznate materije bijele boje, grudvasto-praškaste konstitucije, neto težine 9,441 grama i jednu prozirnu najlonsku kesicu sa sadržajem nepoznate materije bijele boje, grudvasto-praškaste konstitucije, neto težine 33,039 grama za koje materije je vještačenjem utvrđeno da sadrže psihoaktivnu komponentu amfetamin poznatija kao opojna droga „speed“ koja droga je pod rednim brojem 1. Liste psihotropnih tvari iz tabele II „Tvari i biljke pod strogom kontrolom“ proglašena takvom, jednu najlonsku kesicu sa sadržajem biljne materije zelene

boje, neto težine 0,850 grama, za koju biljnu materiju je vještačenjem utvrđeno da sadrži psihoaktivnu komponentu tetrahidrokanabinol (THC), identično kao cannabis, koja opojna droga je pod rednim brojem 13. Liste opojnih droga iz tabele I „Zabranjene tvari i biljke“ proglašena takvom, te jednu digitalnu vagu sive boje,

čime je počinio krivično djelo teška krivična djela protiv sigurnosti javnog prometa iz člana 336. stav 3. u vezi sa članom 332. stav 3. a u vezi sa stavom 1. KZ F BiH u sticaju sa krivičnim djelom neovlaštena proizvodnja i stavljanje u promet opojnih droga iz člana 238. stav 1. KZ F BiH, a sve u vezi sa članom 54. KZ F BiH.

4. Na osnovu člana 238. stav 4. i člana 78. stav 1. KZ F BiH, predlažemo da se od osumnjičenog D A oduzme opojna droga preostala nakon vještačenja i to opojna droga „cannabis“ neto težine 0,830 grama, dva paketića sa opojnom drogom „speed“ neto težina 9,420 grama I 33,017 grama, te jedna digitalna vaga sive boje, a koja opojna droga i predmet se nalaze deponovani u PU I Zenica.

PRIJEDLOG ZA PRODUŽENJE PRITVORA

Obzirom da su ispunjeni opći uslovi za produženje pritvora, to jeste da svi prikupljeni kako subjektivni tako i materijalni dokazi potvrđuju postojanje osnovane sumnje, **a kako je to obrazloženo u dijelu Rezultat istrage,** čime je u cijelosti potvrđena osnovana sumnja da je D. A. počinio krivično djelo teška krivična djela protiv sigurnosti javnog prometa iz člana 336. stav 3. u vezi sa članom 332. stav 3. a u vezi sa stavom 1. KZ F BiH u sticaju sa krivičnim djelom neovlaštena proizvodnja i stavljanje u promet opojnih droga iz člana 238. stav 1. KZ F BiH, a sve u vezi sa članom 54. KZ F BiH, predlažemo da Sud u smislu člana 151. i člana 242. stav 3. ZKP F BiH produži mjeru pritvora prema osumnjičenom D. A. iz razloga propisanih članom 146. stav 1. tačka c) ZKP F BiH, jer i dalje postoje razlozi zbog kojih je pritvor određen, odnosno produžen.